

四庫全書

史部

欽定四庫全書

史記卷四十四

漢 太 史 令 司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

魏世家第十四

魏之先畢公高之後也畢公高與周同姓

索隱左傳富辰說文王之

子十六國有畢原豐郇言畢公是文王之子此云與武周同姓似不用左氏之說馬融亦云畢毛文王庶子

王之伐紂而高封於畢

集解杜預曰畢在長安縣西北正義按地志云畢原在雍州萬

年縣西南於是為畢姓其後絕封為庶人或在中國或

在夷狄其苗裔曰畢萬事晉獻公獻公之十六年趙夙

為御畢萬為右以伐霍耿魏滅之以耿封趙夙以魏封

畢萬

正義魏城在陝州芮城縣北五里鄭玄詩譜云魏姬姓之國武王伐紂而封焉為大夫卜

偃曰

索隱晉掌卜大夫郭偃也

畢萬之後必大矣萬滿數也魏大名

也以是始賞天開之矣天子曰兆民諸侯曰萬民今命

之大以從滿數其必有衆初畢萬卜事晉遇屯之比辛
廖占之曰吉屯固比入吉孰大焉其必蕃昌畢萬封十
一年晉獻公卒四子爭更立晉亂而畢萬之世彌大從

其國名為魏氏生武子

索隱左傳武子名犛系本云畢萬生芒季芒季生武仲州州與

犛聲相近字因以異代亦不同

魏武子以魏諸子事晉公子重耳晉獻

公之二十一年武子從重耳出亡十九年反重耳立為

晉文公而令魏武子襲魏氏之後封列為大夫治於魏

生悼子魏悼子徙治霍

索隱系本云武仲生莊子絳無悼子又系本居篇曰魏武子居

魏悼子徙霍宋忠曰霍地名今河東彘縣也則是有悼子系本鄉大夫代自脫耳然魏今河北魏縣是也正義晉州霍邑縣漢彘縣也後漢改曰永安隋改曰霍邑本春秋時霍伯國也生魏絳魏絳事晉

悼公悼公三年會諸侯悼公弟楊干亂行魏絳僂辱楊

干索隱左傳云僂楊干之僕悼公怒曰合諸侯以為榮今辱吾弟將

誅魏絳或說悼公悼公止卒任魏絳政使和戎翟戎翟

親附悼公之十一年曰自吾用魏絳八年之中九合諸

侯戎翟和子之力也賜之樂三讓然後受之徙治安邑

正義安邑在絳州夏縣安邑故城是魏絳卒謚為昭子集解徐廣曰世本曰莊子索隱系本

錯也居篇又曰昭子生魏嬴嬴生魏獻子索隱系本云

徙安邑亦與此文同獻子名荼荼

莊子之子無魏嬴也獻子事晉昭公昭公卒而六卿彊公室卑晉

頃公之十二年韓宣子老魏獻子為國政晉宗室祁氏

羊舌氏相惡六卿誅之盡取其邑為十縣六卿各令其

子為之大夫獻子與趙簡子中行文子范獻子並為晉

卿索隱簡子趙鞅文子荀寅獻子范吉射其後十四歲而孔子相魯後四

歲趙簡子以晉陽之亂也而與韓魏共攻范中行氏魏

獻子生魏侈索隱侈他本亦作哆盖哆字誤而代數錯也系本獻子生簡子取取生襄子侈而左

傳云魏曼多是也則侈是魏侈與趙鞅共攻范中行氏

襄子中間少簡子一代魏侈之孫曰魏桓子索隱系本云襄子生桓子駒與韓康子趙襄子

共伐滅知伯索隱康子名虎襄子名無恤智伯知瑤也本姓荀亦曰荀瑤正義知音智括地志云

故智城在蒲州虞鄉縣西北四十里古今地名云解縣有智城蓋謂此也分其地桓子之孫

曰文侯都集解徐廣曰世本云斯也索隱系本桓子生文侯斯其傳云孺子疵是魏駒之子與此系

代亦不同也魏文侯元年秦靈公之元年也與韓武子趙桓

子周威王同時索隱系本武子名啓章康子之子桓子名嘉襄子之子六年城少

梁十三年使子擊圍繁龐出其民十六年伐秦築臨晉

元里十七年伐中山使子擊守之趙倉唐傅之子擊逢
文侯之師田子方於朝歌引車避下謁田子方不為禮
子擊因問曰富貴者驕人乎且貧賤者驕人乎子方曰
亦貧賤者驕人耳夫諸侯而驕人則失其國大夫而驕
人則失其家貧賤者行不合言不用則去之楚越若脫
躡然奈何其同之哉子擊不懌而去西攻秦至鄭而還

築雒陰合陽

正義雒漆沮水也城在水南郟陽郟水之北括地志云郟陽故城在同州河西縣南

三里雒陰在同州西也

二十二年魏趙韓列為諸侯二十四年秦

伐我至陽狄

正義括地志云陽狄郭在魏州元城縣東北三十里也

二十五年子

擊生子罄

索隱罄音乙耕反擊武侯名

文侯受子夏經藝客段干木

過其閭未嘗不軾也

正義過先臥反文侯軾干木閭也皇甫謐高士傳云本晉人也守道

不仕魏文侯欲見造其門干木踰牆避之文侯以客禮待之出過其閭而軾其僕曰君何軾曰段干木賢者也
不趨勢利懷君子之道隱處窮巷聲馳千里吾安得勿軾干木先乎德寡人先乎勢干木富乎義寡人富乎財
勢不若德貴財不若義高又請為相不肯後卑已固請見與語文侯立倦不敢息淮南子云段干木晉之大隸而為文侯師呂氏春秋云魏文侯見段干木立倦而不敢息及見翟璜踞于堂而與之言翟璜不悅文侯曰段干木官之則不肯祿之則不受今汝欲官則相至欲祿則上卿至既受吾賞又責吾禮無乃難乎

秦嘗

欲伐魏或曰魏君賢人是禮國人稱仁上下和合未可

圖也文侯由此得譽於諸侯任西門豹守鄴而河內稱

治索隱大河在鄴東故名鄴為河內正義古帝王之都多在河東北故呼河北為河內河南為河外又云

河從龍門南至華陰東至衛州折東北入海曲繞冀州故言河內云也魏文侯謂李克曰

先生嘗教寡人曰家貧則思良妻國亂則思良相今所

置非成則璜集解徐廣曰二子何如李克對曰臣聞之

卑不謀尊疎不謀戚臣在闕門之外不敢當命文侯曰

先生臨事勿讓李克曰君不察故也居視其所親富視

其所與達視其所舉窮視其所不為貧視其所不取五者足以定之矣何待克哉文侯曰先生就舍寡人之相定矣李克趨而出過翟璜之家翟璜曰今者聞君召先生而卜相果誰為之李克曰魏成子為相矣翟璜忿然作色曰以耳目之所覩記臣何負於魏成子西河之守臣之所進也君內以鄴為憂臣進西門豹君謀欲伐中山臣進樂羊中山已拔無使守之臣進先生君之子無傳臣進屈侯鮒臣何以負於魏成子李克曰且子之言

克於子之君者豈將比周以求大官哉君問而置相非成則璜二子何如克對曰君不察故也居視其所親富視其所與達視其所舉窮視其所不為貧視其所不取五者足以定之矣何待克哉是以知魏成子之為相也且子安得與魏成子比乎魏成子以食祿千鍾什九在外什一在內是以東得卜子夏田子方段干木此三人者君皆師之子之所進五人者君皆臣之子惡得與魏成子比也翟璜逡巡再拜曰璜鄙人也失對願卒為第

子二十六年號山崩雍河

集解徐廣曰在陝駟案地理志曰弘農陝縣故號國北號

在太陽東號在滎陽正義括地志云號山在陝州陝三縣西二里臨黃河今臨河有崗阜似是頽山之餘也

十二年伐鄭城酸棗敗秦于注

集解司馬彪曰河南梁縣有注城也正義括地

志云注城在汝州梁縣西十五里注或作鑄也

三十五年齊伐取我襄陵

集解徐廣

曰今在南平陽縣也

三十六年秦侵我陰晉

集解徐廣曰今之華陰索隱年表作齊侵

陰晉秦本紀云惠王六年魏納陰晉更名曰寧秦徐氏云今之華陰也

三十八年伐秦敗

我武下

正義括地志云故武城一名武平城在華州鄭縣東十三里

得其將識

索隱識將

名也武下魏地

是歲文侯卒

索隱紀年云五十年卒

子擊立是為武侯魏

武侯元年趙敬侯初立

索隱紀年云魏武侯元年當趙烈侯之十四年不同也又系本

敬侯名章公子朔為亂不勝奔魏與魏襲邯鄲魏敗而去二

年城安邑王垣

索隱紀年十一年城洛陽及安邑王垣徐廣曰垣縣有王屋山故曰王垣正義

括地志云故城漢垣縣西北二十里七年伐齊至桑丘

正義年表

云齊伐燕取桑丘故魏救燕伐齊至桑丘也括地志云桑丘故城俗名敬城在易州遂城縣界九年翟

敗我於澮

索隱澮音古外反于澮于澮水之側正義括地志云澮高山又云澮山在絳州翼城縣東

北二十五里澮水出此山也

使吳起伐齊至靈丘

正義靈丘蔚州縣也時屬齊故三晉

伐之也齊威王初立

索隱按紀年齊幽公之十八年而威王立十一年與韓趙

三分晉地滅其後十三年秦獻公縣櫟陽十五年敗趙

北蘭

正義在石州趙之西北屬趙故云趙北蘭也

十六年伐楚取魯陽

正義今汝

州魯山縣也

武侯卒

索隱紀年云武侯二十六年卒

子瑩立是為惠王

元年初武侯卒也子瑩與公中緩

正義中音仲

爭為太子公

孫頎自宋入趙

索隱頎音祁紀年云武侯元年封公子緩趙侯種韓懿侯伐我取蔡而惠成王

伐趙圍濁陽七年公子緩如邯鄲以作難是說此事也

自趙入韓謂韓懿侯曰

索隱

懿侯哀侯之子

魏瑩與公中緩爭為太子君亦聞之乎今魏瑩

得王錯

集解徐廣曰汲冢紀年惠王二年魏大夫王錯出奔韓也

挾上黨固半國也

因而除之

集解除徐廣曰除一作倍正義按除除魏瑩及王錯也

破魏必矣不可失

也懿侯說乃與趙成侯合軍并兵以伐魏戰于濁澤

集解

徐廣曰長社有濁澤索隱系本云成侯名種

魏氏大敗魏君為趙謂韓曰除

魏君立公中緩割地而退我且利韓曰不可殺魏君人

必曰暴割地而退人必曰貪不如兩分之魏分為兩不

彊於宋衛則我終無魏之患矣趙不聽韓不說以其少

卒夜去惠王之所以身不死國不分者二家謀不和也

若從一家之謀則魏必分矣故曰君終無適子其國可

破也索隱此蓋古人之言二年魏敗韓于馬陵敗趙于

懷三年齊敗我觀集解徐廣曰齊世家云獻觀以和齊年表曰伐魏取觀今衛縣也索隱田

完魏州魏城縣古之觀國國語云觀國夏啓子太康第

五弟之所封五年與韓會宅陽城正義括地志云宅陽

州滎陽縣東武堵為秦所敗集解徐廣曰秦年表曰敗韓魏洛陽六年伐

取宗儀臺索隱表亦作義臺然義臺見莊子司馬彪亦曰臺名郭象云義臺靈臺也九年伐

敗韓于澮與秦戰少梁虜我將公孫痤集解徐廣曰年表云虜我太子

也取龐秦獻公卒子孝公立十年伐取趙皮牢彗星見

也

十二年星晝墜有聲十四年與趙會鄒十五年魯衛宗

鄭君來朝

索隱紀年魯恭侯宋桓侯衛成侯鄭釐侯來朝皆在十四年鄭釐侯者韓昭侯也韓哀侯

滅鄭而徙都之遂改號曰鄭

十六年與秦孝公會社平侵宋黃池宗

復取之十七年與秦戰元里秦取我少梁圍趙邯鄲十

八年拔邯鄲趙請救于齊齊使田忌孫臏救趙敗魏桂

陵十九年諸侯圍我襄陵築長城塞固陽

正義塞先代反括地志云

相楊縣漢舊縣也在銀州銀城縣界按魏築長城自鄭濱洛北達銀州至勝州固陽縣為塞也固陽有連山東

至黃河西南至夏會等州相音固

二十年歸趙邯鄲與盟漳水上

正義邯鄲

洺州縣也漳水名漳水源出洺州武安縣三門山也

二十一年與秦會彤趙成侯

卒

集解徐廣曰年表云二十七年丹封名會丹魏大臣也

二十八年齊威王卒中

山君相魏

索隱魏文侯滅中山使子擊守之後尋復三國至是始令相魏其中山後又為趙所滅

十年魏伐趙

正義孫臏傳云魏與趙攻韓韓告急齊此文誤耳魏伐趙趙請救齊齊使孫臏救趙

敗魏桂陵乃在十八年也

趙告急齊齊宣王用孫子計救趙擊魏魏

遂大興師使龐涓將而令太子申為上將軍過外黃外

黃徐子

集解駟按劉向別錄曰徐子外黃人也外黃時屬宋正義括地志云故圍城有南北二城在汴

州雍丘縣界本屬外黃即太子申見徐子之地也

謂太子曰臣有百戰百勝之

術太子曰可得聞乎客曰固願效之曰太子自將攻齊

大勝并莒

正義莒密州縣也在齊東南言從西破齊并至莒地則齊土盡矣

則富不過

有魏貴不益為王若戰不勝齊則萬世無魏矣此臣之

百戰百勝之術也太子曰諾請必從公之言而還矣客

曰太子雖欲還不得矣彼勸太子戰攻欲啜汁者衆

正義

啜穿悅反汁之入反冀功勳者衆也

太子雖欲還恐不得矣太子因欲還

其御曰將出而還與北同太子果與齊人戰敗於馬陵

集解徐廣曰在元城索隱按紀年云二十八年與齊田盼戰于馬陵又上二年魏敗韓馬陵十八年趙又敗魏

程陵桂陵與馬陵異處正義虞喜志林云馬陵在濮州
鄆城縣東北六十里有陵澗谷深峻可以置伏按龐涓
敗即此也徐說馬陵在魏州元城縣東南一里龐涓敗
非此地也田完世家云宣王二年魏伐趙趙與韓親共
擊魏趙不利戰于南梁韓請救於齊齊使田忌田嬰將
孫子為師救韓趙以擊魏大破之馬陵按南梁在汝州
又此傳云太子為上將軍過外黃又孫臏傳云魏與趙
攻韓韓告急齊齊使田忌將而往直走大梁魏將龐涓
聞之去韓而歸齊軍已過而西矣按孫子減竈退軍三
日行至馬陵遂殺龐涓虜太子中大破魏軍當如虞喜
之說從汴州外黃退至濮州六十里是也然趙韓共擊
魏戰困于南梁韓急請救于齊齊師走大梁敗魏馬陵
豈合更渡河北至魏州
元城哉徐說定非也

齊虜魏太子申殺將軍涓軍遂

大破三十一年秦趙齊共伐我

索隱紀年云二十九年五月齊田盼伐我東鄙

九月秦衛鞅伐我西鄙十月邯鄲伐我北鄙王
攻衛鞅我師敗績是也然言二十九年不同 秦將商

君詐我將軍公子卬而襲奪其軍破之秦用商君東地

至河而齊趙數破我安邑近秦於是徙治大梁集解徐廣曰今

浚儀駟案汲冢紀年曰梁惠成王九年四月甲寅徙都大梁也索隱紀年以為惠王九年蓋誤也正義陳留風俗傳云魏之都也畢萬十葉徙大梁按今汴州浚儀也 以公子赫為太子三十三

年秦孝公卒商君亡秦歸魏魏怒不入三十五年與齊

宣王會平阿南集解駟按地理志沛郡有平阿縣也惠王數敗於軍旅卑

禮厚幣以招賢者鄒衍淳于髡孟軻皆至梁梁惠王曰

寡人不佞兵三折於外太子虜上將死國以空虛以羞

先君宗廟社稷寡人甚醜之叟不遠千里

集解劉熙曰叟長老之稱

依皓首之言

辱幸至弊邑之廷將何以利吾國孟軻曰君不

可以言利若是夫君欲利則大夫欲利大夫欲利則庶

人欲利上下爭利國則危矣為人君仁義而已矣何以

利為三十六年復與齊王會甄是歲惠王卒

索隱紀年云惠成王

三十六年改元稱一年未卒也

子襄王立

索隱系本襄王名嗣

襄王元年與諸侯

會徐州

集解徐廣曰今薛縣

相王也追尊父惠王為王

集解徐廣曰二年代

趙

五年秦敗我龍賈軍四萬五千于雕陰

集解徐廣曰在上郡正義

括地志云雕陰故縣在鄜州洛交縣北三十里雕陰故城是也

圍我焦曲沃

正義括地志云故焦

城在陝縣東北百步古號城中東北隅周同姓也曲沃有城在陝縣西南三十二里按今有曲沃店也予

秦河西之地

正義自華州北至同州並魏河北之地盡入秦也

六年與秦會應

集解徐廣曰潁川父城有應鄉也正義應乙陵反括地志云故應城故應鄉也在汝州魯山縣東三十里秦

取我汾陰皮氏焦

正義括地志云汾陰故城在蒲州汾陰縣北九里皮氏故城在絳州龍門

縣西一百八十步也魏伐楚敗之陘山

集解徐廣曰在密縣正義括地志云陘山在鄭州新鄭

縣西南三十里七年魏盡入上郡于秦

正義括地志云上郡故城在綏州上縣東南五

十里秦魏之上郡地也按丹廊延綏等州北至固陽並上郡地魏築長城界秦自華州鄭縣已北濱洛至慶州洛源縣白於山即東北至勝州固陽秦降我蒲陽正義縣東至河西上郡之地盡入于秦在隰

州隰州縣蒲邑故城是也八年秦歸我焦曲沃十三年楚敗我襄陵

諸侯執政與秦相張儀會齧桑集解徐廣曰在梁與彭城之間十三年

張儀相魏魏有女子化為丈夫秦取我曲沃正義絳州桐鄉縣晉

曲沃平周正義十三州志云古平周縣在汾州介休縣西五十里也十六年襄王卒

子哀王立張儀復歸秦集解荀勗曰和嶠云紀年起自黃帝終於魏之今王今王者魏

惠成王子案太史公書惠成王但言惠王惠王子曰襄王襄王子曰哀王惠王三十六年卒襄王立十六年卒

并惠襄為五十二年今案古文惠成王立三十六年改元稱一年改元後十七年卒太史公書為誤分惠成之世以為二王之年數也世本惠王生襄王而無哀王然則今王者魏襄王也索隱系本襄王生昭王而無哀王蓋脫一代耳衍叙魏語亦有哀王而紀年說惠成王三十六年又稱後元一十七年卒此文分惠王之歷以為二王之年又有哀王凡二十三年紀事甚明蓋無足疑然則是紀年之作失哀王之代故分襄王之年為惠王後元即以襄王之哀王元年五國共攻秦正義韓魏年包哀王之代耳

不勝而去二年齊敗我觀津

正義括地志云觀津城在冀州棗陽縣東南二十五

里本趙邑今屬魏也

五年秦使樗里子伐取我曲沃

索隱樗里子秦昭王弟名

疾居樗里故因號焉

走犀首岸門

集解徐廣曰潁陰有岸亭索隱犀首官名即公孫衍劉氏云河

東皮氏縣有岸頭亭也正義括地志云岸門
在許州長社縣西北十八里今名西武亭
六年秦求

立公子政為太子

索隱政魏公子也

與秦會臨晉七年攻齊

集解

徐廣曰年表云擊齊虜聲子於濮也

與秦伐燕八年伐衛拔列城二

索隱紀年

云八年翟章伐衛

衛君患之如耳見衛君

正義如耳魏大夫姓名也

曰請罷

魏兵免成陵君可乎衛君曰先生果能孤請世世以衛

事先生如耳見成陵君曰昔者魏伐趙斷羊腸拔闕與

集解徐廣曰在上黨正義闕於連反與音預羊腸坂道在太行山上海口懷州北口潞州闕與故城在潞州及

儀州若斷羊腸拔闕與北連恒約斬趙趙分而為二所
州則趙國東西斷而為二也

以不亡者魏為從主也今衛已迫亡將西請事於秦與

其以秦驛衛不如以魏驛衛

正義
驛音釋

衛之德魏必終無

窮成陵君曰諾如耳見魏王曰臣有謁於衛衛故周室

之別也其稱小國多寶器今國迫於難而寶器不出者

其心以為攻衛驛衛不以王為主故寶器雖出必不入

於王也臣竊料之先言驛衛者必受衛者也如耳出成

陵君入以其言見魏王魏王聽其說罷其兵免成陵君

終身不見九年與秦王會臨晉張儀魏章皆歸于魏

索隱

章為魏將魏相田需死楚害張儀犀首薛公索隱薛公田文也

後又相秦

楚相昭魚謂蘇代索隱昭魚昭奚恤也曰田需死吾恐張儀犀首

薛公有一人相魏者也代曰然相者欲誰而君使之昭

魚曰吾欲太子之自相也索隱太子即襄王也代曰請為君北必

相之昭魚曰奈何對曰君其為梁王代請說君昭魚曰

奈何對曰代也從楚來昭魚甚憂曰田需死吾恐張儀

犀首薛公有一人相魏者也代曰梁王長主也必不相

張儀張儀相必右秦而左魏犀首相必右韓而左魏薛

公相必右齊而左魏梁王長主也必不便也王曰然則
寡人孰相代曰莫若太子之自相太子之自相是三人
者皆以太子為非常相也皆將務以其國事魏欲得丞
相璽也以魏之彊而三萬乘之國輔之魏必安矣故曰
莫若太子之自相也遂北見梁王以此告之太子果相
魏十年張儀死十一年與秦武王會應十二年太子朝
於秦秦來伐我皮氏未拔而解十四年秦來歸武王后
十六年秦拔我蒲阪陽晉封陵

索隱紀年作晉陽封谷
正義陽晉當作晉陽也

史文誤括地志云晉陽故城今名晉城在蒲州虞鄉縣西三十五里表云魏哀王十六年秦拔我杜陽晉陽即

此城也封陵亦在蒲州按陽晉故城在曹州解在蘇秦傳也十七年與秦會臨晉秦

子我蒲阪十八年與秦伐楚集解徐廣曰二十一年與齊王會于韓二十一

年與齊韓共敗秦軍函谷集解徐廣曰二十三年秦復

予我河外及封陵為和哀王卒索隱汲冢紀年終於哀王二十年昭王三年喪

畢始稱元年也子昭王立索隱系本昭王名邀昭王元年秦拔我襄城二

年與秦戰我不利三年佐韓攻秦秦將白起敗我軍伊

闕二十四萬六年予秦河東地方四百里芒卯以詐重

七年秦拔我城大小六十八年秦昭王為西帝齊湣

王為東帝月餘皆復稱王歸帝九年秦拔我新垣曲陽

之城

正義年表及括地志云曲陽故城在懷州濟源縣西十里新垣近曲陽未詳端的所之處也

十

年齊滅宋宋王死我溫十二年與秦趙韓燕共伐齊敗

之濟西湣王出亡燕獨入臨菑與秦王會西周

正義即王城也

今河南郡城也

十三年秦拔我安城

正義括地志云安城故城豫州汝陽縣東南七十一

里兵到大梁去十八年秦拔郢楚王徙陳十九年昭王

卒子安釐王立

索隱系本安僖王名圉

安釐王元年秦拔我兩城

二年又拔我三城軍大梁下韓來救予秦溫以和三年

秦拔我四城斬首四萬四年秦破我及韓趙殺十五萬

人走我將芒卯魏將段干子請予秦南陽集解徐廣曰在脩武以

和蘇代謂魏王曰欲璽者段干子也欲地者秦也今王

使欲地者制璽使欲璽者制地魏氏地不盡則不知已

且夫以地事秦譬猶抱薪救火薪不盡火不滅王曰是

則然也雖然事始已行不可更矣對曰王獨不見夫博

之所以貴梟者便則食不便則止矣今王曰事始已行

不可更是何王之用智不如用梟也

正義博頭有刻為梟形者擲得梟合

食其子若不便則為餘行也

九年秦拔我懷十年秦太子外質於魏

死十一年秦拔我鄆丘

集解徐廣曰鄆一作廩丘又作邢丘鄆丘今為宋公縣索隱鄆

七系反又音妻正義鄆七私反又音妻地理志云汝南郡新鄆縣應邵曰秦伐魏取鄆丘漢興為新鄆章帝封殿後更名宗也秦昭王謂左右曰今時韓魏與始孰彊對曰不

如始彊王曰今時如耳魏齊與孟嘗芒卯孰賢對曰不

如王曰以孟嘗芒卯之賢率彊韓魏以攻秦猶無奈寡

人何也今以無能之如耳魏齊而率弱韓魏以伐秦其

無奈寡人何亦明矣左右皆曰甚然中旗馮琴而對曰

索隱戰國策作推琴春秋後語作伏琴而韓子作推瑟說苑作伏瑟五文各不同王之料天下

過矣當晉六卿之時知氏最彊滅范中行又率韓魏之

兵以圍趙襄子於晉陽決晉水以灌晉陽之城正義括地志云

晉水源出并州晉陽縣西懸壑山山海經云懸壑之山

晉水出焉東南流注汾水昔趙襄子堡晉陽智氏防山

以水灌之不沒者三版其瀆乘高西注入不湛者三版

知伯行水魏桓子御韓康子為參乘知伯曰吾始不知

正義

水之可以亡人之國也乃今知之汾水可以灌安邑

安邑在絳州夏縣本魏都汾
水東北歷安邑西南入河也
絳水可以灌平陽

正義平陽晉州

本韓都也括地志云絳水一名白水今名沸泉源出絳山飛泉奮湧揚波注縣積壑二十許丈望之極為奇觀

矣按引此灌平陽城也魏桓子肘韓康子韓康子履魏桓子肘足

接於車上而知氏地分身死國亡為天下笑今秦兵雖

彊不能過知氏韓魏雖弱尚賢其在晉陽之下也此方

其用肘足之時也願王之必勿易也

索隱易音以豉反

於是秦

王恐齊楚相約而攻魏魏使人求救於秦冠蓋相望也

而秦救不至魏人有唐睢者年九十餘矣謂魏王曰老

臣請西說秦王令兵先臣出魏王再拜遂約車而遣之
唐睢到入見秦王秦王曰丈人芒然乃遠至此甚苦矣
夫魏之來求救數矣寡人知魏之急已唐睢對曰大王
已知魏之急而救不發者臣竊以為用策之臣無任矣
夫魏一萬乘之國也然所以西面而事秦稱東藩受冠
帶祠春秋者以秦之彊足以為與也索隱與謂許與今
為親而結和也
齊楚之兵已合於魏郊矣而秦救不發亦將賴其未急
也使之大急彼且割地而約從王尚何救焉必待其急

而救之是失一東藩之魏而彊二敵之齊楚則王何利焉於是秦昭王遽為發兵救魏魏氏復定趙使人謂魏王曰為我殺范痤吾請獻七十里之地魏王曰諾使吏

捕之圍而未殺痤因上屋騎危

集解危棟上也索隱騎音奇禮云中屋履危蓋

升屋以避兵也

謂使者曰與其以死痤市不如以生痤市有如

痤死趙不予王地則王將奈何故不若與先定割地然後殺痤魏王曰善痤因上書信陵君曰痤故魏之免相也趙以地殺痤而魏王聽之有如彊秦亦將襲趙之欲

則君且奈何信陵君言於王而出之魏王以秦救之故
欲親秦而伐韓以求故地無忌謂魏王曰秦與戎翟同
俗有虎狼之心貪戾好利無信不識禮義德行苟有利
焉不顧親戚兄弟若禽獸耳此天下之所識也非有所
施厚積德也故太后母也而以憂死穰侯舅也功莫大
焉而竟逐之兩弟無罪而再奪之國此於親戚若此而
況於仇讐之國乎今王與秦共伐韓而益近秦患臣甚
惑之而王不識則不明羣臣莫以聞則不忠今韓氏以

一女子奉一弱主內有大亂外交彊秦魏之兵王以為

不亡乎韓亡秦有鄭地與大梁鄰

索隱戰國策亦作鄰俗本或作鄰非

王

以為安乎王欲得故地今負彊秦之親王以為利乎秦

非無事之國也韓亡之後必將更事更事必就易與利

就易與利必不伐楚與趙矣是何也夫越山踰河絕韓

上黨而攻彊趙是復闕與之事

索隱復音扶富反謂前年秦韓相攻闕與而趙

秦破秦軍也

秦必不為也若道河內倍鄴朝歌絕漳滏水與

趙兵決於邯鄲之郊是知伯之禍也秦又不敢伐楚道

涉山谷

索隱道猶行也涉谷是往楚之險路從秦

行三

千里

正義劉伯莊云秦兵向楚有兩道涉谷是西道河外是東道從褒斜入梁州即東南至申州攻石城

山險阨

而攻冥阨之塞

集解孫檢曰楚之險塞也徐廣曰或以為今江夏鄖縣正義冥

音盲括地志云石城山在申州鍾山縣東南二十一里

魏攻冥阨即此山上有古石城水經注云或言在鄖指

此山也

呂氏春秋

所行甚遠所攻甚難

索隱攻亦作致戰國策見作致

軍言致軍糧難也

秦又不為也若道河外倍大梁

正義從河外出函谷關歷

同州南至鄭州東向陳州則背大梁也

右蔡左召陵

集解徐廣曰一無左字正義上蔡縣在豫

州北七十里邵陵故城亦在豫州鄖城縣東四十五里並在陳州西從汴州南行向陳州之西郊則上蔡邵陵

在南面向東皆身與楚兵決於陳郊秦又不敢故曰秦

之右定無左字也必不伐楚與趙矣又不攻衛與齊矣

正義衛齊皆在韓趙魏之東故秦不

伐夫韓亡之後兵出之日非魏無攻已秦固有懷茅集

徐廣曰在脩武軹縣有茅亭正義茅卯包反懷州武陟

縣西十一里故懷城本周邑後屬晉左傳云周與鄭人

蘇忿生十二邑其一曰攢茅括地志云在懷州獲嘉縣東北二十五里也獲嘉古脩武也邢丘集解

曰在平臯正義括地志云平臯故城在懷州武德縣東南二十里本邢丘邑也以其在河之臯地也城坳

津以臨河內索隱戰國策云邢丘安城此少安字坳津在河北坳音九毀反正義坳音詭字誤當

作延括地志云延津故俗字名臨津故城在衛州清河

內共汲必危

集解徐廣曰汲縣屬河內索隱汲亦作波波及汲皆縣名俱屬河內

有鄭地

集解徐廣曰成

得垣雍

集解徐廣曰垣雍城在卷縣卷屬魏也卷縣又有長城經陽武

到蠻者也

正義雍於用反括地志云故城在鄭州原武縣西北七里釋例地名卷縣理或垣城也言韓亡之後

秦有鄭地得垣雍城從熒澤決溝歷雍灌大梁城也

決熒澤水灌大梁大梁必亡

王之使者出過而惡安陵氏於秦

集解徐廣曰召陵有安陵鄉征羗有安陵

亭正義括地志云陽陵縣西北十五里李奇云六國時為安陵也言魏王使者出向秦云共伐韓以成過失而

更惡安陵氏於秦今伐之重非也

秦之欲誅之久矣秦葉陽昆陽與武

陽鄰

正義括地志云葉陽今許州葉縣也昆陽故城在葉縣北二十五里舞陽故城在葉縣東十里此時

葉陽昆陽屬秦聽使者之惡之索隱聽平聲使去聲隨安陵氏而舞陽屬魏也

亡之正義隨猶聽也無忌說言使者惡安陵氏亦聽秦亡安陵氏然繞舞陽之北以東臨許許必危矣秦

有許地魏國可無害繞舞陽之北以東臨許南國必危正義南國今許州許

昌縣南西四十里許昌故城是也此時屬韓在魏之南故言南國括地志云周時為許國武王伐紂所封地理

志云潁川許縣古許國姜姓四岳之後大叔所封二十四君為楚所滅三卿背晉其地屬韓國無害

已夫憎韓不愛安陵氏可也夫不患秦之不愛南國非

也異日者秦在河西晉國去梁千里集解徐廣曰魏國之界千里正義河

西同州也晉國都絳州魏都安邑皆在河東去大梁有千里也

有河山以闌之有周韓

以間之從林鄉軍

集解徐廣曰林鄉在宛縣索隱劉氏云林地名蓋春秋時鄭地之棐林在

大梁之西北徐廣云在宛縣非也正義括地志云宛陵故城在鄭州新鄭縣東北三十八里本鄭舊縣也按劉

徐二說是 以至於今秦七攻魏五入囿中

集解徐廣曰一地也 一作城也索

隱園即圃田圃田鄭數屬魏戰國策作園中正義括地志云圃田澤在鄭州管城縣東三里周禮云豫州數曰

圃田 邊城盡拔文臺墮垂都焚

集解徐廣曰一云魏山都焚句陽有垂亭索隱

文臺臺名列士傳曰隱陵君施酒文臺也垂地名有朝曰都並魏臺邑名正義墮許規反括地志云文臺在曹

州宛句縣西北六十五里也

林木伐麋鹿盡而國繼以圍又長驅梁

北東至陶衛之郊

正義陶曹州定陶也衛即宋州楚丘縣衛文公都之秦兵歷取其郊也

北至平監

集解徐廣曰平縣屬河南

所亡於秦者山南山北

正義山華山也

華山之東南七國時鄧州屬韓汝州屬魏華山之北同華銀綏並魏地也

河外河內

正義河外謂華

州以東至魏陝河內謂蒲州以東至懷衛也

大縣數十

集解徐廣曰一作百

名都數百

集解徐廣曰一作十秦乃在河西晉去梁千里而禍若是矣又況

於使秦無韓有鄭地無河山而闡之無周韓而間之去

大梁百里禍必由此矣異日者從之不成也

索隱從音足松反

楚魏疑而韓不可得也今韓受兵三年秦撓之以講識

亡不聽

索隱撓音苦孝反謂韓被秦之兵撓擾已經三年云欲講說與韓和識猶知也戰國策云韓知

亡猶不聽也

投質於趙請為天下鴈行頓刃楚趙必集兵皆

識秦之欲無窮也非盡亡天下之國而臣海內必不休

矣是故臣願以從事王

索隱從足松反從事謂合從事王也戰國策亦然

王速

受楚趙之約趙挾韓之質

索隱言韓以質子入趙則趙挾韓質而親韓也

以存

韓而求故地韓必效之

索隱效猶致也致故地於趙也

謂此士民不勞

而故地得其功多於與秦共伐韓而又與彊秦鄰之禍

也

正義無忌令魏王速受楚趙之從趙楚挾持韓之質以存韓而魏以求地韓必效之勝於與秦伐韓又與

秦鄰之禍殃也

夫存韓安魏而利天下此亦王之天時已通韓

上黨於共甯

集解徐廣曰朝歌有甯鄉正義共衛州共城縣甯懷州脩武縣本殷之甯邑韓詩外

傳云武王伐紂勒兵於甯故曰脩武今魏開通共甯之道使韓上黨得直路而行也使道安成正義

括地志云故安城在鄭州原武縣東南二十里時屬魏也出入賦之是魏重質韓以

其上黨也今有其賦足以富國韓必德魏愛魏重魏畏

魏韓必不敢反魏是韓則魏之縣也魏得韓以為縣衛

大梁河外必安矣今不存韓二周安陵必危楚趙大破

衛齊甚畏天下西向而馳秦入朝而為臣不久矣二十

年秦圍邯鄲信陵君無忌矯奪將軍晉鄙兵以救趙正義

括地志云魏德故城一名晉鄙城在衛縣西北趙得全
五十里即公子無忌奪晉鄙兵地故名魏德城

無忌因留趙二十六年秦昭王卒三十年無忌歸魏率

五國兵攻秦敗之河內走蒙驁魏太子增質於秦秦怒

欲囚魏太子增或為增謂秦王曰索隱戰國策作蘇秦

公孫喜固謂魏相曰索隱戰國策請以魏疾擊秦秦王

怒必囚增魏王又怒擊秦秦必傷今王囚增是喜之計

中也故不若貴增而合魏以疑之於齊韓秦乃止增三

十一年秦王政初立三十四年安釐王卒太子增立是

為景湑王

索隱系本安釐王
生景愍王午也

信陵君無忌卒景湑王元

年秦拔我二十城以為秦東郡二年秦拔我朝歌衛徙

野王

集解徐廣曰衛
徙濮陽徙野王

三年秦拔我汲五年秦拔我垣蒲

陽行

集解徐廣曰十二年獻城於秦正義括地志云故
垣地本魏王垣也在絳州垣縣西北二十里蒲邑

故城在隰州隰川縣南四十五里在
蒲水之北故曰蒲陽行地名在鄭州

十五年景湑王卒

子王假立王假元年燕太子丹使荆軻刺秦王秦王覺

之

集解徐廣曰
二年新鄭反

三年秦灌大梁虜王假

集解駟案列女
傳曰秦殺假

遂滅魏以為郡縣

太史公曰吾適故大梁之墟墟中人曰秦之破梁引河溝而灌大梁三月城壞王請降遂滅魏說者皆曰魏以不用信陵君故國削弱至於亡余以為不然天方令秦

平海內其業未成魏雖得阿衡之佐曷益乎

索隱譙周云以予所

聞所謂國之云亡者有賢者而不用也如用之何有亡哉使紂用三仁周不能王况秦虎狼乎

索隱述贊曰畢公之苗因國為姓大名始賞盈數自正胤裔繁昌世載忠正揚干就戮智氏奔命文始建侯武實彊盛大梁東徙長安北偵卯既無功卯亦外聘王假削弱虜於秦政

史記卷四十四

史記卷四十四考證

魏世家生武子索隱代亦不同○同監本訛作周今改

正

生魏侈索隱魏曼多是也○多監本訛作侈今改正

與韓武子趙桓子周威王同時○臣照按威字下疑脫

烈字

築雒陰合陽○六國年表雒陰作雒陽紀年作汾陰

文侯受子夏經藝客段干木○六國年表在十八年此

八二十五年

今所置非成則璜○說苑臣術篇作季成子翟觸又作公孫季成翟黃韓詩外傳亦作翟黃

居視其所親富視其所與達視其所舉窮視其所不為
貧視其所不取○說苑臣術篇作貴視其所舉富視其所與貧視其所不取窮視其所不為

臣進屈侯鮒○說苑鮒作附

齊伐取我襄陵○六國年表襄陵作襄陽

公子朔為亂○趙世家六國年表俱作公子朝

戰於濁澤○趙世家及年表俱作涿澤

二年魏敗韓于馬陵敗趙于懷○六國年表敗懷是元
年事敗馬陵是二年事

虜我將公孫痤○商君傳作公叔痤

是歲惠王卒○困學紀聞曰左傳後序曰古書紀年篇
魏惠王三十六年改元從一年始至十六年而稱惠
成王卒即惠王也疑史記誤分惠成之世以為後王

年也朱子曰惠襄哀之年見於竹書明甚史記蓋失其實邵子皇極之書乃從史記而不取竹書

五年秦敗我龍賈軍四萬五千於雕陰圍我焦曲沃予秦河西之地○秦本紀惠文君七年敗龍賈八年魏納河西地是兩年事此併入一年

吾欲太子之自相也索隱太子即襄王也○臣照按余

有丁曰戰國策是哀王時事太子當是昭王索隱解誤今按襄王乃哀王之父豈得謂太子即襄王乎當

是昭王無疑司馬貞未必誤至於此乃傳寫之襲謬也

秦將白起敗我軍伊闕二十四萬○臣照按秦紀云左

更白起攻韓魏於伊闕斬首二十四萬蓋合韓魏之兵共斬首二十四萬耳魏韓兩世家各言二十四萬蓋失實矣

芒卯以詐重○秦藩本此下有索隱言卯以智詐見重於魏共九字

二年又拔我三城○六國年表作秦拔我兩城

蘇代謂魏王曰○蘇代戰國策作孫臣

不湛者三版○湛一本作浸

此亦王之天時已○天時國策作大時

史記卷四十四考證

欽定四庫全書

史記卷四十五

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

韓世家第十五

韓之先與周同姓姬氏其後苗裔事晉得封於韓原

正義括地志云韓原在同州韓城縣西南八里又韓城在縣南十八里故古韓國也

曰韓武子

索隱

按左氏傳云邰晉應韓武之穆則韓是武王之子然詩稱韓侯出租則是有韓而先滅今據此文云其後裔事晉封於原曰韓武子則武子本是韓侯之後晉又封之於韓原即今之馮翊韓城是也然按系本及左傳舊說皆謂韓萬是曲沃桓叔之子即是晉之支庶又國語叔向謂韓宣子能脩武子之德起再拜謝曰自桓叔以下嘉吾子之賜亦言桓叔是韓之祖也今以韓侯之後別有桓叔非闕曲沃之桓叔如此則與太史公之意亦有違

耳武子後三世有韓厥

索隱系本云萬生昧伯昧伯生定伯簡簡生興與生獻子厥

從封姓為韓氏韓厥晉景公之三年晉司寇屠岸賈將作亂誅靈公之賊趙盾趙盾已死矣欲誅其子趙朔韓

厥止賈賈不聽厥告趙朔令亡朔曰子必能不絕趙祀

死不恨矣韓厥許之及賈誅趙氏厥稱疾不出程嬰公

孫杵臼之藏趙孤趙武也厥知之景公十一年厥與卻

克將兵八百乘伐齊敗齊頃公於鞍

正義音安括地志云故鞍城今俗名

馬鞍城在濟州平陰縣十里

獲逢丑父於是晉作六卿而韓厥在一

卿之位號為獻子晉景公十七年病卜大業之不遂者

為崇韓厥稱趙成季之功今後無祀以感景公景公問

曰尚有世乎厥於是言趙武而復與故趙氏田邑續趙

氏祀晉悼公之十年韓獻子老獻子卒子宣子代宣子

徙居州

索隱宣子名起州今在河內是也正義括地志云懷州武德縣本周司寇蘇忿生之州邑也

晉平公十四年吳季札使晉曰晉國之政卒歸於韓魏

趙襄晉頃公十二年韓宣子與趙魏共分祁氏羊舌氏

十縣晉定公十五年宣子與趙簡子侵伐范中行氏宣

子卒子貞子代立貞子徙居平陽

索隱系本作平子名頃宣子子也又云景

子居平陽平陽在山西宋忠曰今

貞子卒子簡子代

集解

河東平陽縣正義平陽晉州城是
徐廣曰史記多無簡子莊子而云貞子生康子班氏亦
同索隱按系本有簡子名不信莊子名庚趙系家亦有

簡子名不佞也

簡子卒子莊子代莊子卒子康子代

索隱康子名虎

康

子與趙襄子魏桓子共敗知伯分其地地益大大於諸

侯康子卒子武子代

索隱武子名啓章

武子二年伐鄭殺其君

幽公十六年武子卒子景侯立

索隱紀年及世本皆作景子名虔

景侯

虔元年伐鄭取雍丘二年鄭敗我負黍六年與趙魏俱

得列為諸侯九年鄭圍我陽翟景侯卒子列侯取立

索隱

系本作武侯也

列侯三年聶政殺韓相俠累

集解徐廣曰六年救魯也索隱戰國

策作殺韓傀高誘曰韓傀俠累也

九年秦伐我宜陽取六邑十三年列

侯卒子文侯立

索隱紀年無文侯系本無列侯

是歲魏文侯卒文侯二

年伐鄭取陽城伐宋到彭城執宋君七年伐齊至桑丘

鄭反晉九年伐齊至靈丘

正義靈丘蔚州縣也此時屬燕

十年文侯卒

子哀侯立哀侯元年與趙魏分晉國二年滅鄭因徙都

鄭

索隱紀年魏武侯二十一年韓滅鄭哀侯入于鄭十二年晉桓公邑哀侯於鄭是韓既徙都因改號曰

鄭故戰國策謂韓惠王曰鄭惠王猶魏徙大梁稱梁王然也

六年韓嚴弑其君哀侯

而子懿侯立

索隱年表懿侯作莊侯又紀年云晉桓公邑哀侯于鄭韓山堅賊其君哀侯而韓若

山立若山即懿侯也則韓嚴為韓山堅也戰國策又有嚴仲子名遂又恐是韓嚴

懿侯二年魏

敗我馬陵

正義在魏州元城縣東南一里

五年與魏惠王會宅陽

正義在鄭

州也

九年魏敗我澮

集解徐廣曰大雨三月也正義澮古外反在絳州澮水之上也

十二

年懿侯卒子昭侯立昭侯元年秦敗我西山二年宋取

我黃池

集解徐廣曰在平丘

魏取宋六年伐東周

正義河南鞏縣

取陵觀

邢丘八年申不害相韓脩術行道國內以治諸侯不來

侵伐十年韓姬弑其君悼公

索隱姬亦作玘並音羊之反姬是韓大夫而王邵亦

云不知悼公何君也

十一年昭侯如秦二十二年申不害死二十

四年秦來拔我宜陽二十五年旱作高門屈宜曰

集解許慎

曰屈宜臼楚大夫在魏也

曰昭侯不出此門何也不時吾所謂時者

非時日也人固有利不利時昭侯嘗利矣不作高門往

年秦拔宜陽今年旱昭侯不以此時卹民之急而顧益

奢此謂時絀舉羸

集解徐廣曰時衰耗而作奢侈

二十六年高門成昭

侯卒果不出此門子宣惠王立

索隱紀年鄭昭侯武甕次威侯立威侯七年與

卽鄆園襄陵五月梁惠王會威侯于巫沙十月鄭宣王朝梁不見威侯之卒下敗韓舉在威侯八年而此系家

即以爲宣惠王之年又上有殺悼公悼公又不知是誰之謚則韓微小國史失代系故此文及系本不同今亦

不可考也

宣惠王五年張儀相秦八年魏敗我將韓舉

索隱按此

則舉是韓將不疑而紀年云韓舉趙將蓋舉本趙將
後入韓又紀年云其敗當韓威王八年是不同也
十

一年君號為王與趙會區鼠十四年秦伐敗我馮

集解徐廣

曰潁川馮陵縣音於乾反正義今許州馮陵縣西北十五里有馮陵故城是也

十六年秦敗我

脩魚虜得韓將鯁申差於濁澤

集解徐廣曰一云鯁申差長社有濁澤索隱脩

魚地名鯁申差二將名鯁音瘦亦作鯁正義按濁澤者

蓋誤當作觀澤年表云秦惠文王更元八年與韓戰斬

首八萬韓宣惠王十六年秦敗我脩魚得將軍申差魏

哀王二年齊敗我觀澤趙武靈王九年與韓魏擊秦齊

潛王七年敗魏世家二濁澤定誤矣徐廣又云濁澤在

長社不曉錯誤之甚括地志云觀澤在魏州頓丘縣東

十八韓氏急公仲謂韓王曰

索隱公仲韓相國名侈

與國非可恃

也今秦之欲伐楚久矣王不如因張儀為和於秦賂以

一名都具甲與之南伐楚此以一易二之計也

索隱一謂名都

也二謂使不伐韓而又與之伐楚也

韓王曰善乃警公仲之行

索隱警戒也戰國策

作傲亦同將西購於秦

索隱戰國策作講講亦謀議與購求意通

楚王聞之大恐

召陳軫告之陳軫曰秦之欲伐楚久矣今又得韓之名

都一而具甲秦韓并兵而伐楚此秦所禱祀而求也今

已得之矣楚國必伐矣王聽臣為之警四境之內起師

言救韓命戰車滿道路發信臣多其車重其幣使信王

之救已也縱韓不能聽我韓必德王也

索隱言韓王信楚之救雖不能

聽待楚救至折入於秦猶德於楚也

必不為鴈行以來

索隱言韓以楚必救已已雖隨秦來

戰猶德於王故不為鴈行而來言不同心旅進也

是秦韓不和也兵雖至楚不

大病也為能聽我絕和於秦秦必大怒以厚怨韓韓之

南交楚必輕秦輕秦其應秦必不敬是因秦韓之兵而

免楚國之患也楚王曰善乃警四境之內興師言救韓

命戰車滿道路發信臣多其車重其幣謂韓王曰不穀

國雖小已悉發之矣願大國遂肆志於秦不穀將以楚

荀韓

索隱 荀從死也 言以死助韓

韓王聞之大說乃止公仲之行

索隱

止不令西之秦

公仲曰不可夫以實伐我者秦也以虛名救我

者楚也王恃楚之虛名而輕絕彊秦之敵王必為天下
大笑且楚韓非兄弟之國也又非素約而謀伐秦也已
有伐形因發兵言救韓此必陳軫之謀也且王已使人
報於秦矣今不行是欺秦也夫輕欺彊秦而信楚之謀
臣恐王必悔之韓王不聽遂絕於秦秦因大怒益甲伐
韓大戰楚救不至韓十九年大破我岸門

集解 徐廣曰 頽倉有岸亭

正義括地志云岸門在許州長社
縣西北十八里今名西武亭矣
太子倉質於秦以和

二十一年

集解徐廣曰周報王之三年也

與秦共攻楚

集解徐廣曰圍景座也敗

楚將屈丐斬首八萬於丹陽

索隱故楚都在今均州也正義左傳例云楚居丹陽

今枝江縣故城是也

是歲宣惠王卒太子倉立是為襄王

集解徐廣曰一

云周赧王六年韓襄哀王三年張儀死赧王九年襄哀王六年秦昭王立

襄王四年與秦武

王會臨晉其秋秦使甘茂攻我宜陽五年秦拔我宜陽

正義括地志云故韓城一名宜陽城在洛州福昌縣東十四里韓宜陽城也

斬首六萬秦武

王卒六年秦復與我武遂九年秦復取我武遂十年太

子嬰朝秦而歸

集解徐廣曰與秦會臨晉囚至咸陽而還

十一年秦伐我取

穰

正義穰人羊反鄧州縣也郭仲產南雍州記云楚之別邑秦初侵楚封公子悝為穰侯後屬韓秦昭王取

也與秦伐楚敗楚將唐昧十二年太子嬰死公子咎公

子蟣虱爭為太子時蟣虱質於楚蘇代謂韓咎曰蟣虱

亡在楚楚王欲內之甚今楚兵十餘萬在方城之外

索隱

方城楚之北境之外謂北境之地也正義括地志云方

城山在許州葉縣西南十八里左傳云楚大夫屈完對

齊桓公曰楚國方城以為城杜公何不令楚王築萬室

預曰方城山在南陽葉縣南

之都雍氏之旁

集解徐廣曰在陽翟正義括地志云故雍氏城在洛州陽翟縣二十五里故老

云黃帝臣雍父作杵臼也韓必起兵以救之公必將矣公因以韓楚

之兵奉蟣虱而內之其聽公必矣必以楚韓封公也韓

咎從其計楚圍雍氏

集解徐廣曰秦本紀惠王後元十三年周赧王三年楚懷王十七年

齊湣王十二年皆云楚圍雍氏紀年於此亦說楚景翠

圍雍氏韓宣王卒秦助韓共敗楚屈丐又云齊宋圍蕢

藜皆與史記年表及田完世家符同然則此卷所云襄

王十二年韓咎從其計以上是楚後圍雍氏赧王之十

五年事也又說楚圍雍氏以下韓求救於秦秦未為發

是楚前圍雍氏赧王之三年事

使公孫昧入韓公仲日子以秦為且救韓乎對曰秦王

之言曰請道南鄭藍田

正義南鄭梁州縣藍田雍州縣秦王言或出雍州西南至鄭或

出雍州東南歷藍田出峽關俱繞楚北境以待
韓使而東救雍氏如此遲緩近不合於楚矣
出兵於

楚以待公殆不合矣

索隱殆不合於南鄭

公仲日子以為果乎對

曰秦王必祖張儀之故智

集解徐廣曰祖者宗之習之謂也故智謂前時計謀也

楚威王攻梁也張儀謂秦王曰與楚攻魏魏折而入於

楚韓固其與國也是孤秦也不如出兵以到之

索隱到欺也猶

俗云張到然戰國策作勁勁強也

魏楚大戰秦取西河之外以歸今其

狀陽言與韓其實陰善楚公待秦而到必輕與楚戰楚

陰得秦之不用也必易與公相支也

索隱言楚陰知秦不為公用亦必易

與公相
支拒也

公戰而勝楚遂與公乘楚施三川而歸

正義施猶設也

三川周天子都也言韓戰勝楚則秦與韓駕御于楚即於天子之都張設救韓之功行霸王之迹加威諸侯乃

歸咸陽是也

公戰不勝楚塞三川守之

正義楚乃塞南河四關守之韓不能

救三

公不能救也竊為公患之司馬庚

集解徐廣曰一作唐

三反

於郢甘茂與昭魚

集解徐廣曰楚相國索隱戰國策謂之昭獻也

遇於商於其

言收璽實類有約也

索隱劉氏云詐言昭魚來秦欲得秦官之印璽收即取之義也

仲恐曰然則奈何曰公必先韓而後秦先身而後張儀

公不如亟以國合於齊楚

正義先以身存韓之計而後知張儀為秦到魏之計不如

急以國合齊楚必委國於公公之所惡者張儀也其實

猶不無秦也正義惡烏故反公孫昧言公仲所惡者張儀到魏之計雖以國合於齊楚其實猶不

輕欺無於是楚解雍氏圍集解徐廣曰甘茂傳曰楚懷王以兵圍韓雍氏韓使公仲

告急於秦秦昭王新立不肯救甘茂為韓言之乃下師

於穀以救韓也又云周赧王十五年韓襄王十二年秦

擊楚斬首二萬敗楚襄城殺景缺周本紀赧王八年之

後云楚圍雍氏此當韓襄王十二年魏哀王十九年紀

年於此亦說楚入雍氏楚人敗然其時張儀已死十年

矣正義自此已上十二年並是楚後圍雍氏赧王之十

五年一段事也前注徐廣云楚圍雍氏之下是楚前圍

雍氏赧王三年事徐說非也徐見下文云先身而後張

儀及公之所惡者張儀也言張儀尚存楚又兩度圍雍

氏故生此前後之見甚誤也然是公孫昧却述張儀時

事說韓相
公仲耳

蘇代又謂秦太后弟羊戎

索隱羊姓名秦宣太后弟號新城

君曰公叔伯嬰恐秦楚之內蟣虱也

索隱戰國策公叔伯嬰與蟣虱及公

子咎並是襄王子然伯嬰即太子嬰嬰前死故咎與蟣虱又爭立此取戰國策說伯嬰未立之先亦與蟣虱爭

立故事重而文倒也

公何不為韓求質於楚

索隱令韓求楚更以別人為質以替蟣虱

也正義為于偽反下同

楚王聽入質子於韓

索隱質子蟣虱也正義蘇代令羊戎為韓

求蟣虱入於韓楚不聽當云楚王不聽入質子於韓承前脫不字耳

則公叔伯嬰知秦楚

之不以蟣虱為事必以韓合於秦楚秦楚挾韓以窘魏

魏氏不敢合於齊是齊孤也公又為秦求質子於楚

索隱

令羊戎教秦於楚索韓所送質子今入之於秦也楚不聽怨結於韓韓挾齊魏

以圍楚楚必重公正義言韓合齊魏以圍楚楚必尊重羊戎以求秦救矣公挾秦

楚之重以積德於韓公叔伯嬰必以國待公於是蟣虱

竟不得歸韓正義自此已前蘇代數計皆不成故韓竟立咎為太子也韓立咎為太

子齊魏王來正義蘇代為韓立計故得齊魏王來十四年與齊魏王共擊

秦至函谷而軍焉十六年秦與我河外及武遂襄王卒

太子咎立是為釐王釐王三年使公孫喜率周魏攻秦

秦敗我二十四萬虜喜伊闕五年秦拔我宛正義宛於元反宛鄧

州縣也時屬韓也

六年與秦武遂地二百里

正義此武遂及上武遂皆宜陽近地

十年秦敗我師於夏山十二年與秦昭王會西周而佐

秦攻齊齊敗湣王出亡十四年與秦會兩周間二十一

年使暴戴

正義音捐韓將姓名

救魏為秦所敗戴走開封二十三

年趙魏攻我華陽

正義司馬彪云華陽山名在密縣鄭州管城縣南四十里

韓告急

於秦秦不救韓相國謂陳筮

集解徐廣曰一作筮索隱戰國策作田荼

曰事

急願公雖病為一宿之行陳筮見穰侯穰侯曰事急乎

故使公來陳筮曰未急也穰侯怒曰是可以為公之主

使乎夫冠蓋相望告敝邑甚急公來言未急何也陳筮
曰彼韓急則將變而他從以未急故復來爾穰侯曰君
無見王請令發兵救韓八日而至敗趙魏於華陽之下

是歲釐王卒子桓惠王立桓惠王元年伐燕九年秦拔

我陘城汾旁

正義陘音刑秦拔陘城於汾水之旁陘故城在絳州曲沃縣西北二十里汾水之旁

也

十年秦擊我於太行

正義太行山在懷州河內縣北二十五里也

我上黨

郡守以上黨郡降趙十四年秦拔趙上黨

正義韓上黨也從太行山

西北澤潞等州是也

殺馬服子卒四十餘萬於長平十七年秦拔

我陽城負秦

正義古今地名云負秦在洛州陽城西三十七里也

二十二年秦昭

王卒二十四年秦拔我城臯滎陽二十六年秦悉拔我

上黨二十九年秦拔我十三城三十四年桓惠王卒子

王安立王安五年秦攻韓韓急使韓非使秦秦留非因

殺之九年秦虜王安盡入其地為潁川郡韓遂亡

正義在亡


秦始皇帝十七年

太史公曰韓厥之感晉景公紹趙鞅之子武以成程嬰

公孫杵臼之義此天下之陰德也韓氏之功於晉未覩

其大者也然與趙魏終為諸侯十餘世宜乎哉

索隱述贊曰韓氏之先實宗周武事微國小春秋無語後裔事晉韓原是處趙孤克立智伯可取既徙平陽又侵負黍景趙據侯惠文僭主秦敗脩魚魏會區鼠韓非雖使不禁狼虎



史記卷四十五

史記卷四十五考證

韓世家曰韓武子索隱國語叔向謂韓宣子能修武子

之德○

臣照

按傳稱叔向謂宣子有藥武子之貧以

為能其德矣其云脩武子之德者自謂樂懷子耳索

隱誤

武子後三世有韓厥索隱系本云萬生賅伯賅伯生定

伯簡簡生輿輿生獻子厥○攷左傳正義引世本云

桓叔生子萬萬生求伯求伯生子輿子輿生獻子厥

與此所引不同

韓嚴弑其君哀侯而子懿侯立○吳師道戰國策補注
曰策曰東孟之會韓王及相皆在焉聶政刺韓傀兼
中哀侯又曰聶政刺相兼中哀侯許異斃哀侯而殪
之是故哀侯為君而許異終身相焉夫哀侯既弑其
子懿侯即立許異將誰相哉此乃烈侯三年之事但
戰國策誤以為哀侯耳又威烈王五年韓嚴遂弑哀
侯解者引正義云紀年晉桓公邑哀侯於鄭韓山堅

賊其君哀侯而立韓君山山堅即韓嚴也君山即懿侯也愚按此事國策誤合二事為一司馬遷兩存而不決故溫公與劉道原書蘇氏古史皆疑之史記年表世家兩書韓嚴是聶政之事乃嚴遂而弑哀侯者乃韓嚴通鑑書嚴遂弑哀侯綱目書嚴遂下註哀侯以韓廙為相而憂韓遂二人相害遂刺廙於朝併中哀侯亦仍誤也

韓姬弑其君悼公索隱王邵亦云不知悼公何君也○

徐孚遠曰蓋以昭侯首尾二十六年中間特云殺悼公故曰不知悼公何君也蓋史誤

十一年君號為王。案楚世家及六國年表韓君稱王在楚懷之六年是年於韓為十年此作十一年

公子蟣虱。戰國策作幾瑟

請道南鄭藍田出兵於楚以待公殆不合矣。國策云請道于南鄭藍田以入攻楚出兵于三川以待公殆不合兵於南鄭矣

司馬康三反於郢集解徐廣曰一作唐。戰國策作司
馬康

史記卷四十五考證

欽定四庫全書

史部

史記卷四十六至五十一

詳校官侍讀學士臣陸伯焜

洗馬臣王坦修覆勘

覆校官中書臣孫希旦

校對官中書臣陳墉

謄錄舉人臣陳燮

欽定四庫全書

史記卷四十六

漢 太 史

令司馬遷 撰

宋中郎外兵曹參軍裴駙集解

唐國子博士弘文館學士司馬貞素隱

唐諸王侍讀率府長史張守節正義

田敬仲完世家第十六

陳完者陳厲公佗之子也

素隱佗音徒何反此系家以佗為厲公而左傳厲公名躍

陳系家又有利公躍利即厲也是厲公名躍非名佗也
蓋佗是厲公之兄立未踰年無謚今此云厲公佗非也
佗一名五父故經云蔡人殺陳
佗傳又云蔡人殺五父是也
完生周太史過陳陳厲

公使卜完卦得觀之否是為觀國之光利用賓于王此

其代陳有國乎不在此而在異國乎非此其身也在其

子孫若在異國必姜姓姜姓四嶽之後

集解杜預云姜姓之先為堯四

嶽也物莫能兩大陳衰此其昌乎

正義陳湣公周敬王四十年為楚惠王所滅

齊簡公周敬王三十九年被田常所殺厲公者陳文公少子也其母蔡女

文公卒厲公兄鮑立是為桓公桓公與佗異母及桓公

病蔡人為佗殺桓公鮑及太子免而立佗為厲公厲公既立娶蔡女蔡女淫於蔡人數歸厲公亦數如蔡桓公之少子林怨厲公殺其父與兄乃令蔡人誘厲公而殺之林自立是為莊公故陳完不得立為陳大夫厲公之殺以淫出國故春秋曰蔡人殺陳佗罪之也莊公卒立弟杵臼是為宣公宣公十一年殺其太子禦寇禦寇與完相愛恐禍及已完故奔齊齊桓公欲使為卿辭曰羈旅之臣幸得免負擔君之惠也不敢當高位桓公使為

工正

正義工巧之長
若將作大匠

齊懿仲欲妻完卜之占曰是謂鳳

皇于蜚和鳴鏘鏘有媯之後將育于姜五世其昌竝於

正卿八世之後莫之與京卒妻完完之奔齊齊桓公立

十四年矣完卒諡為敬仲仲生穉孟夷

索隱系本作夷
孟思蓋穉是名

孟夷
字也

敬仲之如齊以陳字為田氏

集解徐廣曰應劭云
始食采地由是改姓

田氏索隱據史此文敬仲奔齊以陳田二字聲相近遂
為田氏正義按敬仲既奔齊不欲稱本故國號故改陳

字為
田氏

田穉孟夷生湣孟莊

集解徐廣曰一作芷索隱
系本作閩孟克芷昌改反田

湣孟莊生文子須無田文子事齊莊公晉之大夫欒逞

作亂於晉來奔齊

索隱逞音盈史記多作逞字

齊莊公厚客之晏嬰

與田文子諫莊公弗聽文子卒生桓子無字田桓子無

字有力事齊莊公甚有寵無字卒生武子開與釐子

正義

釐音僖

乞田釐子乞事齊景公為大夫其收賦稅於民以

小斗受之其粟予民以大斗行陰德於民而景公弗禁

由此田氏得齊衆心宗族益彊民思田氏晏子數諫景

公景公弗聽已而使於晉與叔向私語曰齊國之政其

卒歸於田氏矣晏嬰卒後范中行氏反晉晉攻之急范

中行請粟於齊田乞欲為亂樹黨於諸侯乃說景公曰
范中行數有德於齊齊不可不救齊使田乞救之而輸

之粟景公太子死後有寵姬曰芮子生子荼

集解徐廣曰一作粥

子索隱荼音舒又如字

景公病命其相國惠子與高昭子以子荼

為太子

索隱惠子名夏昭子名張

景公卒兩相高國立荼是為晏孺

子而田乞不說欲立景公佗子陽生陽生素與乞歡晏

孺子之立也陽生奔魯田乞偽事高昭子國惠子者每

朝代參乘言曰始諸大夫不欲立孺子孺子既立君相

之大夫皆自危謀作亂又給大夫曰高昭子可畏也及未發先之諸大夫從之田乞鮑牧與大夫以兵入公室攻高昭子昭子聞之與國惠子救公公師敗田乞之衆追國惠子惠子奔莒遂反殺高昭子晏孺子奔魯田乞使人之魯迎陽生陽生至齊匿田乞家請諸大夫曰常之母有魚菽之祭幸而來會飲會飲田氏田乞盛陽生

橐中

索隱橐音託橐中謂皮橐之中

置坐中央發橐出陽生曰此乃齊

君矣大夫皆伏謁將盟立之田乞誣曰吾與鮑牧謀共

立陽生也鮑牧怒曰大夫忘景公之命乎諸大夫欲悔陽生乃頓首曰可則立之不可則已鮑牧恐禍及已乃復曰皆景公之子何為不可遂立陽生於田乞之家是為悼公乃使人遷晏孺子於駘正義音臺又音台賈逵云齊地也而殺

孺子荼悼公既立田乞為相專齊政四年田乞卒子常代立是為田成子鮑牧與齊悼公有郟弑悼公齊人共

立其子壬是為簡公田常成子與監止

集解駟案監一作關索隱監如

字又苦濫反監姓止名

俱為左右相相簡公田常心害監止監止

幸於簡公權弗能去於是田常復修釐子之政以大斗

出貸以小斗收齊人歌之曰嫗乎采芑歸乎田成子索隱

言嫗之采芑菜皆歸入于田成子以刺齊國之政將歸陳氏也齊大夫朝御鞅諫簡公

索隱御官也鞅名也亦田氏之族曰田監不可竝也君其擇焉君弗聽

子我者監止之宗人也索隱齊系家云子我夕賈遠云即監止也尋其文意當是監止

今云宗人太史誤爾常與田氏有郤田氏疏族田豹事子我有寵

子我曰吾欲盡滅田氏適以豹代田氏宗豹曰臣於田

氏疏矣不聽已而豹謂田氏曰子我將誅田氏田氏弗

先禍及矣子我舍公宮田常兄弟四人乘如公宮欲殺

子我子我閉門簡公與婦人飲檀臺

正義在青州臨淄縣東北一里將

欲擊田常太史子餘曰田常非敢為亂將除害簡公乃

止田常出聞簡公怒恐誅將出亡田子行曰需事之賊

也

索隱需音須需者疑也疑必致難故云事之賊也

田常於是擊子我子我率

其徒攻田氏不勝出亡田氏之徒追殺子我及監止簡

公出奔田氏之徒追執簡公於徐州

索隱徐音舒徐州齊邑薛縣是也非

九州之徐正義齊之西北界上地名在渤海郡東平縣也

簡公曰蚤從御鞅之言不

及此難田氏之徒恐簡公復立而誅已遂殺簡公簡公
立四年而殺於是田常立簡公弟騫是為平公平公即
位田常為相田常既殺簡公懼諸侯共誅已乃盡歸魯
衛侵地西約晉韓魏趙氏南通吳越之使脩功行賞親
於百姓以故齊復定田常言於齊平公曰德施人之所
欲君其行之刑罰人之所惡臣請行之行之五年齊國
之政皆歸田常田常於是盡誅鮑晏監止及公族之彊
者而割齊自安平以東

集解徐廣曰安平在北海索隱
司馬彪郡國志北海東安平六

國時曰安平徐廣說是正義括地志云安平城在青州臨淄縣東十九里古紀國之鄆邑青州即北海郡也

至琅邪

正義琅邪沂州也從安平已東萊登沂密等州皆自為田常封邑也

自為封邑封

邑大於平公之所食田常乃選齊國中女子長七尺以

上為後宮後宮以百數而使賓客舍人出入後宮者不

禁及田常卒有七十餘男

索隱鮑昱云陳成子有數十婦生男百餘人與此亦異然

譙允南按春秋陳恆為人雖志大負殺君之名至於行事亦脩整故能自保非苟為禽獸之行夫成事在姦雖

子七十祗以長亂事豈然哉言其非實也

田常卒子襄子盤代立

集解徐廣曰盤一作

堅索隱堅音許既反系本作班

相齊常謚為成子田襄子既相齊宣公

三晉殺知伯

集解徐廣曰宣公之三年時也

分其地襄子使其兄弟宗

人盡為齊都邑大夫與三晉通使且以有齊國襄子卒

子莊子白立

索隱系本名伯

田莊子相齊宣公宣公四十三年

伐晉毀黃城圍陽狐

正義括地志云故黃城在魏州冠氏縣南十里陽狐郭在魏州元城

縣東北三十二里也

明年伐魯葛及安陵

正義括地志云故魯城在許昌縣南四十里本

魯朝宿邑長葛故城在許州長葛縣北十二里鄭之葛邑也 隰陵故城在許州隰陵縣西北十五里李奇云六

國時為安陵也

明年取魯之一城莊子卒子太公和立

索隱紀年齊宣

公十五年田莊子卒明年立田悼子悼子卒乃次立田和是莊子後有悼子盖立年無幾所以作系本及史記

者不得錄也而莊周及鬼谷子亦云田成子殺齊君十
二代而有齊國今據系本系家自成子至王建之滅祗
十代若如紀年則悼子及侯剡即有十二
代與莊子鬼谷說同明紀年亦非妄說也

田太公相齊

宣公宣公四十八年取魯之邾

正義音城括地志云故邾城在兗州泗水縣西

北五十里說文云邾魯孟邑是也

明年宣公與鄭人會西城伐衛取母

丘

索隱母音貫古國名衛之邑今作母者字殘缺耳正義括地志云故貫城即古貫國故貫今名濠澤城在

曹州濟陰縣南五十六里也

宣公五十一年卒田會自廩丘反

索隱紀年

宣公五十一年公孫會以廩丘叛於趙

宣公卒子康公

貸立

集解徐廣曰十一年伐魯取最索隱貸音土代反最音祖外反

貸立十四年淫於

酒婦人不聽政太公乃遷康公於海上食一城以奉其

先祀明年魯敗齊平陸

集解徐廣曰東平平陸正義兗州縣也

三年太公

與魏文侯會濁澤

集解徐廣曰康公之十六年索隱徐廣蓋依年表為說而不省此上文貸

立十四年又云明年會平陸又三年會濁澤是十八年表及此注並誤

求為諸侯魏文侯

乃使使言周天子及諸侯請立齊相田和為諸侯周天

子許之康公之十九年田和立為齊侯列於周室紀元

年齊侯太公和立二年和卒

集解徐廣曰伐魯破之

子桓公午立

索隱紀年齊康公五年田侯午生二十二年田侯剌立後十年齊田午弒其君及孺子喜而為公春秋後傳亦

云田午弑田侯及其孺子喜而兼齊是為桓侯與此系家不同也

桓公午五年秦魏攻

韓韓求救於齊齊桓公召大臣而謀

索隱大臣謂駟忌段干朋如戰國策

威王二十六年邯鄲之役有此謀臣爾又南梁之難在宣王二年有駟子田忌孫臏之謀戰國策又有張丑其詞前後交互是記者所取各異故不同也曰蚤救之孰與晚救之駟忌曰不

若勿救段干朋曰

索隱段干姓朋名也戰國策作段干綸

不救則韓且折

而入於魏不若救之田臣思曰

索隱戰國策作田期思紀年謂之徐州子期蓋

即田忌也過矣君之謀也秦魏攻韓楚趙必救之是天以燕

子齊也桓公曰善乃陰告韓使者而遣之韓自以為得

齊之救因與秦魏戰楚趙聞之果起兵而救之齊因起

兵襲燕國取桑丘

正義括地志云桑丘故城俗名敬城在易州遂城縣爾時齊伐燕桑丘魏

趙來救之魏趙世家竝云伐齊至桑丘皆是易州

六年救衛桓公卒

索隱紀年梁惠王十

三年當齊桓公十八年後威王始見則桓公十九年而卒與此不同

子威王因齊立是歲

故齊康公卒絕無後奉邑皆入田氏齊威王元年三晉

因齊喪來伐我靈丘

正義靈丘河東蔚州縣案靈丘此時屬齊三晉因喪伐之韓魏趙世

家云伐齊至靈丘皆是蔚州

三年三晉滅晉後而分其地六年魯伐

我入陽關

集解徐廣曰在鉅平正義括地志云魯陽關故城在兗州博城縣南二十九里西臨汶水

也
晉伐我至博陵

正義在濟州西界也

七年衛伐我取薛陵九年

趙伐我取甄威王初即位以來不治委政卿大夫九年

之間諸侯竝伐國人不治於是威王召即墨大夫而語

之曰自子之居即墨也

正義萊州膠水縣南六十里即墨故城是也

毀言曰

至然吾使人視即墨田野闢民人給官無留事東方以

寧是子不事吾左右以求譽也封之萬家召阿大夫語

曰自子之守阿譽言日聞然使使視阿田野不闢民貧

苦昔日趙攻甄

正義音絹即濮州甄城縣北合在即墨字上也

子弗能救衛取

薛陵子弗知是子以幣厚吾左右以求譽也是日烹阿大夫及左右嘗譽者皆并烹之遂起兵西擊趙衛敗魏於濁澤而圍惠王惠王請獻觀以和解趙人歸我長城於是齊國震懼人人不敢飾非務盡其誠齊國大治諸侯聞之莫敢致兵於齊二十餘年騶忌子以鼓琴見威王威王說而舍之右室須臾王鼓琴騶忌子推戶入曰善哉鼓琴王勃然不說去琴按劍曰夫子見容未察何以知其善也騶忌子曰夫大弦濁以春溫者君也小弦

廉折以清者相也

集解琴操曰大絃者君也寬和而溫小絃者臣也清廉而不亂索隱春秋

後語溫字作春春氣溫義亦相通蔡邕曰凡絃以緩急為清濁琴緊其絃則清緩其絃則濁清濁者言琴之聲

也攫之深

集解徐廣曰以爪持也攫音已足反

醜之愉者

集解徐廣曰一作舒索隱醜音

擇與下文舍字並同愉音舒

政令也鈞諧以鳴大小相益回邪而不

相害者四時也吾是以知其善也王曰善語音騶忌子

曰何獨語音夫治國家而弭人民皆在其中王又勃然

不說曰若夫語五音之紀信未有如夫子者也若夫治

國家而弭人民又何為乎絲桐之間騶忌子曰夫大弦

濁以春溫者君也小弦廉折以清者相也攫之深而醜
之愉者政令也鈞諧以鳴大小相益回邪而不相害者
四時也夫復而不亂者所以治昌也連而徑者所以存
亡也故曰琴音調而天下治夫治國家而弭人民者無
若乎五音者王曰善駟忌子見三月而受相印淳于髡
見之曰善說哉髡有愚志願陳諸前駟忌子曰謹受教
淳于髡曰得全全昌失全全亡索隱得全謂人臣事君
之禮全具無失故云得
全也全昌者謂若無失則
身名獲昌故云全昌也
駟忌子曰謹受令請謹毋離

前索隱謂佩服此言常無淳于髡曰豨膏棘軸所以為

滑也然而不能運方穿索隱豨膏猪脂也棘軸以棘木為車輪至滑而堅也然而穿孔

若方則不能運轉言逆理反經也故下駟忌子曰謹受

令請謹事左右淳于髡曰弓膠昔幹集解徐廣曰一作乾所以為

合也然而不能傳合疏罅索隱幹音孤悍反昔久舊也

析昔音相近言作弓之法以膠被昔幹而納諸槩中是

猶以勢令人合也傳音附罅音呼嫁反以言膠幹可以

勢暫合而久亦不能常傳合於踈罅隙縫以言人臣自

也

萬民駟忌子曰謹受令請謹自附於萬民淳于髡曰

裘雖弊不可補以黃狗之皮騶忌子曰謹受令請謹擇

君子毋雜小人其間淳于髡曰大車不較不能載其常

任琴瑟不較不能成其五音

索隱較者校量也言有常制若車不較則車不能載

常任琴瑟不較則琴不能成五音

騶忌子曰謹受令請謹脩法律而督

姦吏淳于髡說畢趨出至門而面其僕曰是人者吾語

之微言五其應我若響之應聲是人必封不久矣

集解騶按

新序曰齊稷下先生喜議政事騶忌既為齊相稷下先生淳于髡之屬七十二人皆輕騶忌以為設以微辭騶忌必不能及乃相與俱往見騶忌淳于髡之徒禮踞騶忌之禮卑淳于髡等稱辭騶忌知之如應響淳于髡等

辭誣而去騶忌之禮踞淳于髡之禮卑故所以尚干將莫邪者貴其立斷也所以尚騏驎者爲其立至也必且歷日曠久則絲毫能挈石駕馬亦能致遠是以聰明捷敏人之美材也居暮年封以下邳

號曰成侯威王二十三年與趙王會平陸二十四年與

魏王會田於郊魏王問曰王亦有寶乎威王曰無有索隱

韓嬰詩外傳以爲齊宣王其說不同所以異也梁王曰若寡人國小也尚有徑

寸之珠照車前後各十二乘者十枚奈何以萬乘之國

而無寶乎威王曰寡人之所以爲寶與王異吾臣有檀

子者

索隱檀子齊臣檀姓子男子美稱大夫皆稱子盼子田盼也黔夫及種首皆臣名事悉具戰國策

使守南城則楚人不敢為寇東取泗上十二諸侯皆來

朝

索隱 邾莒
宋魯之比

吾臣有盼子者使守高唐則趙人不敢東

漁於河吾吏有黔夫者使守徐州則燕人祭北門趙人

祭西門

集解 賈逵曰齊之北門西門也言
燕趙之人畏見侵伐故祭以求福徒而從者七

千餘家吾臣有種首者使備盜賊則道不拾遺將以照

千里豈特十二乘哉梁惠王慙不懌而去二十六年魏

惠王圍邯鄲趙求救於齊齊威王召大臣而謀曰救趙

孰與勿救駟忌子曰不如勿救段干朋曰不救則不義

且不利威王曰何也對曰夫魏氏并邯鄲其於齊何利

哉且夫救趙而軍其郊是趙不伐而魏全也故不如南

攻襄陵

正義襄陵故城在兗州鄒縣也

以弊魏邯鄲拔而乘魏之弊威

王從其計其後成侯駟忌與田忌不善公孫閱謂成侯

忌曰

索隱戰國策作公孫閱

公何不謀伐魏田忌必將戰勝有功

則公之謀中也戰不勝非前死則後北而命在公矣於

是成侯言威王使田忌南攻襄陵十月邯鄲拔齊因起

兵擊魏大敗之桂陵

索隱在威王二十六年正義在曹州乘氏縣東北二十一里

是齊最彊於諸侯自稱為王以令天下三十三年殺其

大夫牟辛

集解徐廣曰一作夫人索隱牟辛大夫姓字也徐廣與年表並作夫人王邵按紀年云齊

桓公十一年殺其君毋宣王八年殺其王后然則夫人之字或如紀年之說三十五年公孫

閱又謂成侯忌曰公何不令人操十金卜於市曰我田

忌之人也吾三戰而三勝聲威天下欲為大事亦吉乎

不吉乎卜者出因令人捕為之卜者驗其辭於王之所

田忌聞之因遂率其徒襲攻臨淄求成侯不勝而犇索隱

按戰國策田忌前敗魏於馬陵因被購不得入齊歷十年乃出犇也是時齊都臨淄且孟嘗列傳云田忌襲齊

之邊邑其言爲得
即與系家不同也

三十六年威王卒子宣王辟彊立宣

王元年秦用商鞅周致伯於秦孝公二年魏伐趙趙與

韓親共擊魏趙不利戰於南梁

索隱晉太康地記曰戰國謂梁為南梁者別之

於大梁少梁也正義括地志云故梁在汝州西南二百步晉太康地記云戰國時謂南梁者別之於大梁少梁也古蠻子邑也宣王召田忌復故位韓氏請救於齊宣王召大

臣而謀曰蚤救孰與晚救騶忌子曰不如勿救田忌曰

弗救則韓且折而入於魏不如蚤救之

索隱紀年威王十四年田盼伐

梁戰馬陵戰國策云南梁之難有張田對云早救之此云鄒忌者王邵云此時鄒忌死已四年又齊威此時未

稱王故戰國策謂之田侯今此以田侯孫子曰索隱夫為宣王又橫稱鄒忌者蓋此說皆誤爾孫臏夫

韓魏之兵未弊而救之是吾代韓受魏之兵顧反聽命於韓也且魏有破國之志韓見亡必東面而愬於齊矣吾因深結韓之親而晚承魏之弊則可重利而得尊名也宣王曰善乃陰告韓之使者而遣之韓因恃齊五戰不勝而東委國於齊齊因起兵使田忌田嬰將集解徐廣曰嬰孫子為帥救韓趙以擊魏大敗之馬陵索隱在宣殺其將龐涓虜魏太子申其後三晉之王皆因田嬰朝

一作盼

孫子為帥救韓趙以擊魏大敗之馬陵

索隱在宣王二年

齊王於博望

正義括地志云博望故城在鄧州向城縣東南四十五里

在盟而去

集解徐廣

曰表云三年與趙會博望伐魏

七年與魏王會平阿南

正義沛郡平阿縣也

明年

復會甄魏惠王卒

索隱按紀年梁惠王乃是齊湣王為東帝秦昭王為西帝時此時梁惠王

改元稱一年未卒也而系家及其後即為魏襄王之年又以此文當齊宣王時實所不能詳考

明年與

魏襄王會徐州諸侯相王也十年楚圍我徐州十一年

與魏伐趙趙決河水灌齊魏兵罷十八年秦惠王稱王

宣王喜文學游說之士自如騶衍淳于髡

正義贊齊之稷下先生

也

田駢

正義白眠反藝文志云田駢齊人遊稷下號天口駢作田子二十五篇也

接子

正義齊人

藝文志云接子慎到正義趙人戰國時處士環淵正義

二篇在道家流楚人孟子傳云環淵著書上下篇也之徒七十六人皆賜列第為上大夫

不治而議論是以齊稷下學士復盛且數百千人集解駟案

劉向別錄曰齊有稷門城門也談說之士期會於稷下也索隱齊地記曰齊城西門側系水左右有講室趾往

往存焉蓋因側系水故曰稷門古側稷音相近爾又虞喜曰齊有稷山立館其下以待游士亦異說也春秋傳

曰莒子如齊盟於稷門是也十九年宣王卒子湣王地立索隱系湣本名遂

王元年秦使張儀與諸侯執政會于齧桑三年封田嬰

於薛四年迎婦于秦七年與宋攻魏敗之觀澤十二年

攻魏楚圍雍氏

集解徐廣曰在陽翟屬韓

秦敗屈丐蘇代謂田軫曰

臣願有謁於公其為事甚完使楚利公成為福不成亦

為福今者臣立於門客有言曰魏王謂韓馮張儀曰集解

徐廣曰韓之公仲侈也

煇棗將拔

集解徐廣曰在濟陰宛胸

齊兵又進子來救

寡人則可矣不救寡人寡人弗能拔

索隱能猶勝也言不勝其拔故聽齊

拔之耳

此特轉辭也秦韓之兵毋東旬餘則魏氏轉韓從

秦秦逐張儀

索隱逐謂隨逐也

交臂而事齊楚此公之事成也

田軫曰奈何使無東對曰韓馮之救魏之辭必不謂韓

王曰馮以爲魏必曰馮將以秦韓之兵東却齊宋馮因

搏

集解徐廣曰音專專猶并合制領之謂也索隱搏音團謂握領也徐亦通

三國之兵乘屈

丐之弊南割於楚故地必盡得之矣張儀救魏之辭必

不謂秦王曰儀以爲魏必曰儀且以秦韓之兵東距齊

宋儀將搏三國之兵乘屈丐之弊

正義屈丐楚將爲秦所敗今更欲乘之

南割於楚名存亡國實伐三川而歸

索隱三川韓也

此王業也

公令楚王與韓氏地

索隱公謂陳軫

使秦制和謂秦王曰請與

韓地而王以施三川

正義施張設也言秦王與天子都張設迫脅也

韓氏之兵

不用而得地於楚韓馮之東兵之辭且謂秦何曰秦兵不用而得三川伐楚韓以窘魏魏氏不敢東是孤齊也張儀之東兵之辭且謂何曰秦韓欲地而兵有案聲威

發於魏魏氏之欲不失齊楚者有資矣魏氏轉秦韓爭

事齊楚楚王欲而無與地

集解徐廣曰楚王欲得魏來事已而不欲與韓地也

公

令秦韓之兵不用而得地有一大德也

正義蘇代謂陳軫令秦韓之兵

不戰伐而得地陳軫於秦韓豈不有大恩德

秦韓之王劫於韓馮張儀而東

兵以徇服魏公常執左券以責於秦韓

索隱券要也左不正也言我以

右執其左而責之正義左券下右券上也蘇代說陳軫
以上券令秦韓不用兵得地而以券責秦韓却韓馮張
儀以徇服魏故秦韓善此其善於公而惡張子多資矣
陳軫而惡張儀多取矣

十三年秦惠王卒二十二年與秦擊敗楚於重丘

集解徐廣

曰表曰與秦擊楚使公子將大有功

二十四年秦使涇陽君質於齊二十

五年歸涇陽君於秦孟嘗君薛文入秦即相秦文亡去

二十六年

集解徐廣曰孟嘗君為相

齊與韓魏共攻秦至函谷軍焉

二十八年秦與韓河外以和兵罷二十九年趙殺其主

父齊佐趙滅中山

集解徐廣曰三十年田甲劫王相薛文走

三十六年王為

東帝秦昭王為西帝蘇代自燕來入齊見於章華東門

集解駟按左思齊都賦註曰齊小城北門也而此言東門不知為是一門非耶正義括地志云齊城章華之東有閭門武鹿門也齊王曰嘻善子來秦使魏冉致帝子以為何

如對曰王之問臣也卒而患之所從來微願王受之而勿備稱也秦稱之天下安之王乃稱之無後也且讓爭帝名無傷也秦稱之天下惡之王因勿稱以收天下此大資也且天下立兩帝王以天下為尊齊乎尊秦乎王曰尊秦曰釋帝天下愛齊乎愛秦乎王曰愛齊而憎秦

曰兩帝立約伐趙孰與伐桀宋之利

集解駟案宋世家云宋王偃諸侯皆

曰桀宋也

王曰伐桀宋利對曰夫約鈞然與秦為帝而天下

獨尊秦而輕齊釋帝則天下愛齊而憎秦伐趙不如伐

桀宋之利故願王明釋帝以收天下倍約賓秦無爭重

而王以其間舉宋夫有宋衛之陽地危

集解駟案陽地濮陽之地正義

按衛此時河南獨有濮陽也

有濟西趙之阿東國危

正義阿東阿也爾時屬趙故云

東國有淮北楚之東國危

正義淮北徐泗也東國謂下相僮取慮也

有陶平

陸梁門不開

正義陶定陶今曹州也平陸兖州縣也縣在大梁東界

釋帝而貸之

以伐桀宋之事國重而名尊燕楚所以形服天下莫敢
不聽此湯武之舉也敬秦以為名而後使天下憎之此
所謂以卑為尊者也願王孰慮之於是齊去帝復為王
秦亦去帝位三十八年伐宋秦昭王怒曰吾愛宋與愛

新城陽晉

正義括地志云新城故城在宋州宋城縣界
陽晉故城在曹州乘氏縣西北三十七里

同韓聶與吾友也而攻吾所愛何也蘇代為齊謂秦王
曰韓聶之攻宋所以為王也齊彊輔之以宋楚魏必恐
恐必西事秦是王不煩一兵不傷一士無事而割安邑

也正義年表云秦昭王二十一年魏納安邑及河內此韓聶之所禱於王也秦

王曰吾患齊之難知一從一衡其說何也對曰天下國

令齊可知乎齊以攻宋其知事秦以萬乘之國自輔不

西事秦則宋治不安索隱戰國策作宋地不安中國白頭游敖之士

皆積智欲離齊秦之交伏式結軼西馳者未有一人言

善齊者也索隱軼音姪軼者車轍也言車轍往還如結戰國策作結軻伏式結軼東

馳者未有一人言善秦者也何則皆不欲齊秦之合也

何晉楚之智而齊秦之愚也晉楚合必議齊秦齊秦合

必圖晉楚請以此決事秦王曰諾於是齊遂伐宋宋王

出亡死於溫

正義懷州有溫城

齊南割楚之淮北西侵三晉欲

以并周室為天子泗上諸侯鄒魯之君皆稱臣諸侯恐

懼二十九年秦來伐拔我列城九四十年燕秦楚三晉

合謀各出銳師以伐敗我濟西

集解徐廣曰案其餘諸傳無楚伐齊事年表云

楚取淮北

王解而却燕將樂毅遂入臨淄盡取齊之寶藏器

湣王出亡之衛衛君辟宮舍之稱臣而共具湣王不遜

衛人侵之湣王去走鄒魯有驕色鄒魯君弗內遂走莒

楚使淖齒將兵救齊

索隱淖音女教反

因相齊湣王淖齒遂殺

湣王而與燕共分齊之侵地鹵器

正義鹵掠齊寶器也

湣王之遇

殺其子法章變名姓為莒太史敷

集解徐廣曰音躍一音皎

家庸太

史敷女竒法章狀貌以為非恒人憐而常竊衣食之而

與私通焉淖齒既以去莒莒中人及齊亡臣相聚求湣

王子欲立之法章懼其誅已也久之乃敢自言我湣王

子也於是莒人共立法章是為襄王以保莒城而布告

齊國中王已立在莒矣襄王既立立太史氏女為王后

是為君王后生子建太史敷曰女不取媒因自嫁非吾種也汙吾世終身不覩君王后君王后賢不以不覩故失人子之禮襄王在莒五年田單以即墨攻破燕軍迎

襄王於莒入臨菑齊故地盡復屬齊齊封田單為安平

君

正義安平城在青州臨淄縣東十九里古紀之鄰邑也

十四年秦擊我剛壽十

九年襄王卒子建立王建立六年秦攻趙齊楚救之秦

計曰齊楚救趙親則退兵不親遂攻之趙無食請粟於

齊齊不聽周子曰

索隱蓋齊之謀臣史失名也戰國策以周子為蘇秦而楚字皆作燕然此

時蘇秦死已久矣

不如聽之以退秦兵不聽則秦兵不却是秦

之計中而齊楚之計過也且趙之於齊楚扞蔽也

正義此時

秦伐趙上黨欲克無意伐齊楚故言趙之於齊楚為扞蔽也

猶齒之有脣也脣亡則

齒寒今日亡趙明日患及齊楚且救趙之務宜若奉漏

甕沃焦釜也夫救趙高義也却秦兵顯名也義救亡國

威却彊秦之兵不務為此而務愛粟為國計者過矣齊

王弗聽秦破趙於長平四十餘萬遂圍邯鄲十六年秦

滅周君王后卒二十三年秦置東郡二十八年王入朝

秦秦王政置酒咸陽三十五年秦滅韓三十七年秦滅
趙三十八年燕使荊軻刺秦王秦王覺殺軻明年秦破
燕燕王亡走遼東明年秦滅魏秦兵次於歷下四十二
年秦滅楚明年虜代王嘉滅燕王喜四十四年秦兵擊
齊齊王聽相后勝計不戰以兵降秦秦虜王建遷之共
集解駟按地理志河內有共
縣正義今衛州共城縣也遂滅齊為郡天下壹并於
秦秦王政立號為皇帝始君王后賢事秦謹與諸侯信
齊亦東邊海上秦日夜攻三晉燕楚五國各自救於秦

以故王建立四十餘年不受兵君王后死后勝相齊多
受秦間金多使賓客入秦秦又多予金客皆為反間勸
王去從朝秦不脩攻戰之備不助五國攻秦秦以故得
滅五國五國已亡秦兵卒入臨淄民莫敢格者王建立遂
降遷於共故齊人怨王建不蚤與諸侯合從攻秦聽姦
臣賓客以亡其國歌之曰松耶栢耶住建共者客耶集解
徐廣曰戰國策曰秦處建於共松栢間也索隱耶音邪
謂是建客邪客說建住言遂乃失策令建遷共共今在
河內也疾建用客之不詳也索隱謂不詳審用
客不知其善否也

太史公曰蓋孔子晚而喜易易之為術幽明遠矣非通人達才孰能注意焉故周太史之卦田敬仲完占至十世之後及完犇齊懿仲卜之亦云田乞及常所以比犯

二君

索隱比如字又頓律反二君即悼公簡公也倍子廢晏孺子鮑牧以乞故殺悼公而成子又殺簡公

故云田氏比犯二君也

專齊國之政非必事勢之漸然也蓋若遵

殿兆祥云

索隱述贊曰田完避難犇于大姜始辭羈旅終焉鳳皇物莫兩盛代五其昌二君比犯三晉爭強和始檀命威遂稱王濟急燕趙弟列康莊秦假東帝莒立法章王建失國松栢蒼蒼

史記卷四十六

史記卷四十六考證

田敬仲完世家敬仲之如齊以陳字為田氏○顧炎武曰此亦太史公之誤春秋傳未有稱田者至戰國時始為田耳

子太公和立索隱莊周及鬼谷子亦云田成子殺齊君十二代而有齊國○徐孚遠曰莊生在齊宣王時豈得逆數王建以為十二代蓋總言田氏擅齊之數

騶忌曰○徐孚遠曰騶忌始以鼓琴干成王不宜在桓

公已與廷議且其事與下文所載亦相類

段干朋曰○此與下文救趙之事戰國策皆作段干綸

春秋後語作段干萌

孫子曰○戰國策以為田成思之言

孫子為帥○帥一本作師

夫約鈞然○

臣照

按戰國策補注曰言齊秦俱相約如

此一本無然字疑鈞字即約字之訛而又重出耳去

鈞然二字文義自明

燕秦楚三晉合謀各出銳師以伐敗我濟西集解徐廣

曰按其餘諸傳無楚伐齊事年表云楚取淮北○臣

照

按樂毅傳燕使樂毅約趙惠文王別使連楚魏令

趙嚮秦以伐齊之利樂毅并護趙楚韓魏燕之兵以
伐齊焉得云無楚伐齊事也

疾建用容之不詳也索隱謂不詳審用容不知其善否

也○臣照按古字簡少詳佯祥三字通為詳此詳字

作祥解

史記卷四十六考證